



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKI NAČELNIK

Tel: 032 650 022 www.opcina-tesanj.ba
032 650 547 E-mail: optesanj@bih.net.ba
Fax: 032 650 220 fuad.sisic@opcina-tesanj.ba



Trg Alije Izetbegovića 11,
74260 Tešanj

Broj: _____/10

Datum: _____

NACRT

Na osnovu člana 12. Zakona o javnom redu i miru ("Službene novine Ze-Do kantona" broj 8/00, 15/03 i 11/07), člana 7. Zakona o zaštiti od buke („Službene novine Ze-Do kantona“ broj 2/08) i člana 14. Statuta Općine Tešanj ("Službeni glasnik Općine Tešanj" broj 11/07) Općinsko vijeće Tešanj na svojoj ___ sjednici održanoj dana _____2011. godine donosi

ODLUKU o javnom redu i miru

I - OPĆE ODREDBE

Član 1.

Ovom Odlukom uređuje se javni red i mir na području općine Tešanj, te se utvrđuje koje radnje, postupci i ponašanja pored prekršaja utvrđenih Zakonom o javnom redu i miru predstavljaju prekršaje protiv javnog reda i mira.

Član 2.

Pod javnim mjestom u smislu ove Odluke smatra se mjesto na koje je slobodan pristup neodređenom broju lica bez ikakvih uvjeta (ulice, trgovi, javni putevi, izletišta, čekaonice, ugostiteljske, trgovinske i zanatske radnje, sredstva i objekti javnog prijevoza i sl.) ili pod određenim uvjetima (sportski stadioni i igrališta, bioskopske, pozorišne i koncertne sale, izložbene prostorije i sl.), kao i druga mjesta koja u određenom vremenskom periodu služe za ovakve svrhe (zemljišta ili prostorije u kojima se održavaju skupovi, takmičenja i sl.).

Smatrat će se prekršaj iz ove Odluke izvršen na javnom mjestu i kad je radnja izvršena na mjestu i kad je radnja izvršena na mjestu koje se u smislu stava (1) ovog člana ne smatra javnim mjestom, ako je to mjesto dostupno vidiku sa javnog mjesta (balkoni, terase, hodnici, dvorišta i sl.) ili ako je posljedica nastupila na javnom mjestu.

Pod javnim mjestom smatraju se i ona mjesta koja nisu navedena u stavu 1. i 2. Ovog člana ako radnja koja se odvija u njima remeti mir drugih lica.

Član 3.

Prekršaji javnog reda i mira u skladu sa odredbama ove Odluke su:

1. Uznemiravanje građana pjevanjem, igranjem kola, plesanjem, sviranjem i na drugi način u objektima kolektivnog stanovanja i individualnim stambenim objektima ili na otvorenom prostoru u naseljima u vremenu od 22.00 do 06.00 sati.
2. Izvođenje muzike u živo ili upotreba uređaja za reprodukciju muzike u ugostiteljskim objektima:

- a) U zatvorenom prostoru u ugostiteljskim objektima od 24.00 do 06.00 sati, izuzev ugostiteljskih objekata tipa disko klub od 02.00 do 06.00 sati,
 - b) U baštama ugostiteljskih objekata od 23.00 do 06.00 sati, ako jačina zvuka prelazi dopuštenu razinu.
3. Upotreba aparata i muzičkih instrumenata sa pojačanjem zvuka na javnim površinama (kolovozi i trotoari ulica i cesta, parkirališta, trgovi, pješačke staze, autobuska stajališta, pijace, parkovi, travnjaci, prostori između i oko zgrada, rekreacione površine, sportska igrališta, tržni prostori oko prodajnih objekata) bez pribavljanja odobrenja nadležnog organa.
 4. Ulazak u prostorije i u ograđene prostorije preduzeća, javnih ustanova i drugih institucija na mjestima koja nisu određena za ulaz, kao i izlazak van mjesta određenih za izlaz.
 5. Uznemiravanje građana stvaranjem prekomjerne buke, noću i u vrijeme dnevnog odmora prouzrokovane prevoznim sredstvima, utovarom, istovarom i neopreznim rukovanjem predmeta, koji stvaraju buku i to u vremenu od 16.00 do 18.00 sati (dnevni odmor) i od 22.00 do 06.00 sati (zimi) kao i od 23.00 do 06.00 sati (ljeti), osim za vrijeme vjerskih obreda ili manifestacija, koji se organizuju povodom državnih i vjerskih praznika, održavanjem javnih priredbi i programa na otvorenom prostoru ili drugim prostorijama;
 6. Prskanje prolaznika vodom prilikom pranja vozila, ulica, pločnika, dvorišta i zalijevanja vrtova i travnjaka, te prskanje pješaka prilikom upravljanja vozilom;
 7. Bacanje na prolaznike i automobile leda i snijega savijenog u grudve, bacanje kamenja ili drugih predmeta, kao i bacanje iz zgrada ili ograđenih prostora predmeta i smeća ili prosipanje tekućine na prolaznike i na sve javne površine.
 8. Postupanje sa životinjama na način koji izaziva uznemiravanje i negodovanje građana:
 - a) Puštanje i vođenje psa na javnom mjestu bez zaštitne korpice na njušci i povodca;
 - b) Držanje opasnih životinja na način kojim se može ugroziti život i zdravlje građana, neisticanje upozorenja na opasnost od takvih životinja na ulazu i zatvorenom dvorištu ili drugom prostoru gdje su smještene,
 - c) Držanje životinja u urbanoj sredini koje remete noćni mir građana,
 - d) Surovo postupanje sa životinjama na javnom mjestu, podstrekavanjem na borbu i izazivanje životinja.
 9. Uznemiravanje građana upotrebom zvona na ulazu u stan ili kuću, kucanjem ili udaranjem na vrata stana ili kuće bez potrebe, radi pružanja usluga koje nisu ugovorene ili naručene;
 10. Pranje motornih vozila, prosipanje motornog ulja na mjestima gdje to nije predviđeno i pranje tepiha i drugih stvari ispred zgrada i na drugim mjestima gdje to nije predviđeno;
 11. Neovlašteno izvođenje radova na električnim i PTT instalacijama u stambenim zgradama za čije je izvođenje potrebno odobrenje i saglasnost nadležnog organa;
 12. Konzumiranja alkoholnih pića ispred prodavnica i na svim drugim javnim mjestima osim mjesta i manifestacija koja u svom rješenju i sadržaju manifestacije, odobravaju konzumiranje;
 13. Pisanje i isticanje grafita po objektima bez saglasnosti vlasnika i drugih javnim površinama, lomljenje sadnica i rasada, te vršenje fiziološke potrebe na mjestima koja za to nisu predviđena.

14. Ljepljenje i isticanje parola ili plakata izvan mjesta namijenjenih za oglašavanje, kao i ljepljenje i isticanje parola ili plakata uvredljivog sadržaja na javnim mjestima.
15. Igranje nogometa, košarke, tenisa i drugih igara na ulicama, trgovima, parkovima, zelenim i drugim javnim površinama, koje nisu namjenjene za navedene svrhe ili u ograđenim površinama (prostorima) bez dozvole vlasnika odnosno nadležnog organa.
16. Kupanje na javnim kupalištima, bazenima, rijekama i potocima bez kupaće odjeće, kao i hodanje u kupaćoj odjeći u naseljenim mjestima.
17. Posjedovanje, prodaja i korištenje petardi i drugih pirotehničkih sredstava čijom bi se upotrebom izazvala uznemirenost građana na javnim mjestima.
18. Zaustavljanje i parkiranje motornih vozila na ulazu u stambene objekte, garaže, trotoare, zelene površine ili drugim mjestima na kojima bi se ometalo odvijanje saobraćaja.
19. Prodaja robe i pružanje usluga na javnim površinama, bez odobrenja nadležnog organa;
20. Nedoovoljeno zalaženje i zadržavanje u prostorijama javnih ustanova, obrazovnih institucija, školskim dvorištima, vjerskim objektima, dvorištima vjerskih objekata i grebljima-grobljima.
21. Pomjeranje posuda za smeće sa mjesta koja su utvrđena odlukom nadležnog organa, odlaganje smeća izvan kontejnera, paljenje vatre u i oko kontejnera, oštećenje kontejnera, kao i oštećenje klupa po parkovima, šetalištima i drugim javnim površinama.
22. Ležanje ili spavanje na ulici, putu, klupi u parkovima, čekaonicama, autobuskim stajalištima, pod mostovima i drugim sličnim javnim površinama.
23. Ometanje težih invalida, starijih i iznemoglih lica, trudnica i lica sa djecom u naručju da ostvare pravo prvenstva kod pružanja zdravstvenih usluga, korištenje javnog prijevoza, kupovine robe i drugim sličnim situacijama.
24. Izbacivanje otpadaka iz motornog vozila u pokretu na javne i druge površine.
25. Posjedovanje predmeta pogodnih za nanošenje tjelesnih povreda u prijevoznim sredstvima ili na drugim mjestima čijim posjedovanjem bi se izazvala uznemirenost građana.
26. Neovlašteno uklanjanje zaštite na otvorima za vodovod i kanalizaciju (šahtovi) električnu i telefonsku zaštitu (vrata ormarića ili ko ih od ovlaštenih radnika nakon izvršenog pregleda ne vraća na svoje mjesto, čime se dovode u opasnost građani (prolaznici).
27. Ko ne poštuje odluke o kućnom redu u stambenim, školskim, zdravstvenim i drugim institucijama.
28. Sjedenje na trotoarima, ivičnjacima, mostovima, naslonima klupa i zaštitnim ogradama.

Član 4.

Odobrenje iz člana 3. tačka.3. ove Odluke izdaje nadležni organ Općine.

Odobrenje iz predhodnog stava izdaje se sa ograničenim rokom važnosti, te stoga obavezno sadrži: vrijeme korištenja naprave za pojačanje zvuka i mjesto, te uslovi pod kojim se može vršiti upotreba zvuka, odnosno izvođenje muzike i upotreba uređaja za reprodukciju muzike.

Član 5.

Prekršajni postupak za učinjeni prekršaj iz ove Odluke, pokreće se i vodi u skladu sa Zakonom o prekršajima Federacije BiH.

II - KAZNENE ODREDBE

Član 6.

Novčanom kaznom u iznosu od **500,00 do 5.000,00 KM** kaznit će se pravno lice za prekršaje iz člana 3. tačka 2. alineja a) i b), tačke 5., 11., 19. i 26.

Član 7.

Novčanom kaznom u iznosu od **100,00 do 500,00 KM** kaznit će se odgovorno lice u pravnom licu za prekršaje iz člana 3. tačka 2. alineja a) i b), tačke 5., 11., 19. i 26.

Član 8.

Novčanom kaznom od **50,00 do 300,00 KM** kaznit će se fizičko lice za prekršaje iz člana 3. tačka 1., od tačke 3. do tačke 17. i od tačke 19. do tačke 28.

Član 9.

Novčanom kaznom u iznosu od **40,00 KM** kaznit će se vozač koji zaustavi ili parkira vozilo protivno odredbama člana 3. tačka 18.

Član 10.

Za prekršaje propisane ovom Odlukom učinjene od strane maloljetnika, kaznit će se roditelj, usvojilac, staratelj ili zakonski zastupnik maloljetnika, ako je prekršaj učinjen kao posljedica propusta dužnog staranja o maloljetniku, a u mogućnosti su da takav nadzor vrše.

Član 11.

Pod imaoceom radnje odnosno vršioceom samostalne djelatnosti u smislu ove Odluke smatra se fizičko lice koje obavlja neku od zakonom dozvoljenih i registrovanih djelatnosti.

Član 12.

Nadzor nad sprovođenjem odredaba ove Odluke u okviru svoje nadležnosti vrše inspeksijski organi i nadležno Ministarstvo unutrašnjih poslova u okviru svoje nadležnosti.

Član 13.

Kada službenici policije u vršenju službenih poslova i zadataka saznaju za prekršaj propisan ovom Odlukom, mogu privremeno oduzeti predmete koji su upotrebljeni ili su bili namjenjeni za izvršavanje prekršaja, kao i predmete koji mogu poslužiti kao dokaz u prekršajnom postupku.

III - PRIJELAZNE I ZAVRŠNE ODREDBE

Član 14.

Stupanjem na snagu ove Odluke prestaje da važi Odluka o javnom redu i miru ("Službeni glasnik Općine Tešanj" broj 5/07).

Član 15.

Ova Odluka stupa na snagu osmog dana od dana objavljivanja u "Službenom glasniku Općine Tešanj".

I PRAVNI OSNOV

Na osnovu člana 12. Zakona o javnom redu i miru ("Službene novine ZE-Do kantona" broj 8/00, 15/03 i 11/07), člana 7. Zakona o zaštiti od buke („Službene novine Ze-Do kantona“ broj 2/08) i člana 14. Statuta Općine Tešanj („Službeni glasnik Općine Tešanj“ broj 11/07).

II RAZLOZI ZA DONOŠENJE

Razlozi za donošenje nove Odluke o javnom redu i miru nastale su na osnovu ukazane potrebe Policijske uprave Tešanj za lakše sprovođenje iste uz usaglašavanje predloženih rješenja sa zakonskom regulativom i usaglašavanja Odluke o javnom redu i miru sa Zakonom o zaštiti od buke („Službene novine Ze-Do Kantona“ broj 2/08), Odlukom o radnom vremenu u određenim djelatnostima na području općine Tešanj („Službeni glasnik Općine Tešanj“ broj 12/01 i 4/10), te stoga predlažemo usvajanje nacрта Odluke, a nakon čega će se provesti javna rasprava u trajanju od 15 dana i pripremiti konačan prijedlog Odluke.

Dostavljeno:

1. Općinsko vijeće
2. Arhiv

OBRAĐIVAČ:
STRUČNA SLUŽBA OPĆINE
POMOĆNIK OPĆINSKOG NAČELNIKA
Ferid Mustafić

PREDLAGAČ:
OPĆINSKI NAČELNIK
Fuad Šišić, dipl.ing.maš.

Broj 02-02-1-4262-2/10
Datum: 19.01.2011.godine